

IMFASHANYIGISHO

AMATEGEKO AKORESHWA MU GUKUMIRA NO GUHANA
IHOHOTERWA RISHINGIYE KU GITSINA

Twebe nk'abahungu tugomba kuzungura
tweyine imitungo ya papa abakobwa
bagafashwa mu kubona ibishyingiranywa



Mwese mufite uburenganzira
bungana nk'abana ku mutungo
wanjye nk'umubyeyi wanyu mu
izungura.



IMFASHANYIGISHO

AMATEGEKO AKORESHWA MU GUKUMIRA NO GUHANA IHOHOTERWA RISHINGIYE KU GITSINA

Aka gatabo kateguwe n'umuryango uharanira uburenganzira
bw'umwana n'umugore HAGURUKA

NA NTAGANDA Eugene, afite impamyanya bumenyi y'icyiciro cya
gatatu cya kaminuza, impuguke mu mategeko

Ku nkunga ya **trōcaire**

IBIRIMO

IBIRIMO.....	5
IRIBURIRO.....	7
0. INTANGIRIRO.....	9
0.1. Kwibwirana no kumenyana.....	9
0.2 Kumenya indangagaciro.....	10
0.3. Gusuzuma ibyifuzo ndetse n’ubumenyi.....	11
IGICE CYA MBERE:.....	12
IGISOBANURO CYO KUVUKA URI UMUKOBWA CYANGWA UMUHUNGU NO GUSOBANUKIRWA N'AMAGAMBO Y'INGENZI AZIFASHISHWA MU MAHUGURWA.....	12
Isomo rya 1: Kuvuka uri umuhungu cyangwa umukobwa.....	12
Isomo rya 2: Sobanukirwa n'amagambo y'ingenzi azifashishwa mu mahugurwa.....	13
IGICE CYA KABILI:.....	16
AGACIRO KA MUNTU N'INCAMAKE Y'AMATEGEKO AKORESHWA MU GUKUMIRA NO GUHANA IHOHOTERWA RISHINGIYE KU GITSINA.....	16
Isomo rya 1: Imyumvire ishingiyeye ku gitsina.....	16
Isomo rya 2: Inzu y’urwunge rw’amategeko akoreshwa mu Rwanda.....	17
Isomo rya 3: Uwo amategeko areba.....	18
IGICE CYA GATATU:.....	20
IHAME RY'UBURINGANIRE HAGATI Y'UMUGABO N'UMUGORE.....	20
Isomo rya 1: Uburinganire hagati y’abashakanye.....	20
Isomo rya 2: Ni nde wakora ibi bikurikira hagati y’umugore n’umugabo?.....	21
IGICE CYA KANE:.....	23
GUKUMIRA IHOHOTERWA RISHINGIYE KU GITSINA KU BIJYANYE N’IMICUNGIRE Y’UMUTUNGO W’ABASHYINGIRANYWE, IMPANO N'IZUNGURA.....	23
Isomo rya 1: Abana b’abahungu n’abakobwa.....	23
Isomo rya 2: Izungura rya Nyakwigendera Nkubito.....	24
IGICE CYA GATANU:.....	26
KURINDWA IHOHOTERWA RISHINGIYE KU GITSINA RISHINGIYE K’UMURIMO.....	26
Isomo rya 1: Ivangura mu itangwa ry’akazi rishingiyeye ku gitsina.....	26

Isomo rya 2: Ikiruhuko cyo kubyara.....	28
Isomo rya 3: Guhoza undi ku nkeke ku kazi bifitanye isano n'imibonano mpuzabitsina.....	30
IGICE CYA GATANDATU:.....	32
IBYAHA N'IBIHANO BYABYO BIJYANYE N'IHOHOTERWA RISHINGIYE KU GITSINA	32
Isomo rya 1: Ibikorwa bigize ihohoterwa rishingiye ku gitsina	32
Isomo rya 3: Gufata ku ngufu uwo bashakanye	38
Isomo rya 4: Gukubita uwo bashakanye.....	39
Isomo rya 5: Gushyingira ku gahato.....	40
IGICE CYA KALINDWI:.....	44
INZIRA Z'UBUTABERA N'UBUNDI BUFASHA KUWAHOHOTEWE	44
Isomo rya 1: Inzira z'ubutabera.....	44
Isomo rya 2: Imirongo ya telefone itishyurwa.....	45
UMUGEREKA W'AMATEGEKO N'INGINGO Z'INGENZI BYAKORESHEJWE....	47

IRIBURIRO

Umuryango nyarwanda wubakiye ku mahame ashingiyeye ku mucu ndetse n'imigenzo bituma rimwe na rimwe habaho ubusumbane hagati y'abagabo n'abagore. Ubwo busumbane buhembera ihohoterwa rishingiyeye ku gitsina cyane cyane igitsina gore bigatuma abarikorewe bagira intege nke ndetse rimwe na rimwe bagafata ibibakorerwa nk'aho ari ibintu bisanzwe. Ariko kandi, byumvikane neza ko abagabo n'abahungu nabo bashobora gukorerwa ihohoterwa rishingiyeye ku gitsina kandi nabo bakagira imbogamizi zifite aho zihurira n'umuco ndetse n'imigenzo.

Mu Rwanda, ubusumbane hagati y'abagabo n'abagore bwakunze kugaragara mu buryo butandukanye ndetse bugatizwa umurindi n'umuco. Ubusumbane akenshi bwahaga urwaho amakimbirane yo mu muryango. Amategeko y'imbonezamubano nay'impanabyaha nayo ari mubyatizaga umurindi ihohoterwa rikorerwa abagore n'abakobwa. Ubwo busumbane hagati y'uburenganzira bw'umugabo n'umugore bwaje gukurwaho mu rwego rw'amategeko havugururwa amategeko y'imponezamubano nay'impanabyaha. Nubwo amategeko yahindutse ndetse agakumira akanahana ihohoterwa iryo ariryo ryose, mu bigaragara ihohoterwa rishingiyeye ku gitsina riracyahari mu muryango nyarwanda hashingiwe no kudasobanukirwa n'uburenganzira n'inshingano bikubiye muri ayo mategeko yashyizweho. Niyo mpamvu aringombwa ko abanyarwanda bakomeza kwigishwa kuri ayo amategeko kugirango bayasobanukirwe.

Ni muri urwo rwego iyi nyigisho yateguwe. Iyi mfashanyigisho iragerageza gusobanura ihohoterwa rishingiyeye ku gitsina, amategeko akoreshwa mu gukumira, no guhana ihohoterwa iryo ari ryo ryose rishingiyeye ku gitsina ndetse n'inzira uwahohotewe acamo kugira ngo abone ubufasha ndetse anarenganurwe.

Iyi mfashanyigisho ikaba igizwe n'ibice birindwi (7) by'ingenzi aribyo bikurikira:

- Igisobanuro cyo kuvuka uri umukobwa cyangwa umuhungu no gusobanukirwa n'amagambo y'ingenzi azifashishwa mu mahugurwa;
- Agaciro ka muntu n'incamake y'amategeko akoreshwa mu gukumira no guhana ihohoterwa rishingiyeye ku gitsina,
- Ihame ry'uburinganire hagati y'umugabo n'umugore;
- Gukumira ihohoterwa rishingiyeye ku gitsina ku bijyanye n'imicungire y'umutungo w'abashyiranywe, impano n'izungura;
- Gukumira ihohoterwa rishingiyeye ku gitsina rishingiyeye k'umurimo;
- Ibyaha n'ibihano bijyanye n'ihohoterwa rishingiyeye ku gitsina;
- Inzira z'ubutabera n'ubundi bufasha k'uwahohotewe.

Iyi mfashanyigisho kandi ni ingenzi mu gufasha abafatanyabikorwa ba HAGURUKA na TROCAIRE guhugura abagererwa bikorwa (abafashamyumvire) babafasha kumva no gusobanukirwa ihohoterwa rishingiyeye ku gitsina, amategeko akoreshwa mu gukumira no

guhana ihohoterwa rishingiye ku gitsina ndetse n'inzira uwahohotewe acamo kugira ngo ahabwe ubufasha.

Intego nyamukuru yizi mfashanyigisho ni ukumenya gukoresha neza igihe mu mahugurwa. Cyakora mu rwego rwo guhugura abagenerwabikorwa ku nsanganyamatsiko z'ingenzi, buri kiganiro gishobora gukorwa mu buryo bwihariye cyangwa muburyo rusange. Ibiganiro bigomba guha abahugurwa umwanya uhagije wo kuganira ku ngingo z'amategeko zijyanye n'ihohoterwa rishingiye ku gitsina. Ibiganiro byateguwe mu buryo butuma abahugurwa bose bagira uruhare mu kwigisha no kwiga.

Turashimira cyane umufatanyabikorwa w'ingenzi TROCAIRE hamwe n'abandi bafatanyabikorwa bose bagize uruhare mu itegurwa no gutangaza izi mfashanyigisho. Turizera ko ibikubiyemo bizafasha abahugurwa (abagabo n'abagore); abafashamyumvire, abagize amatsinda y'urubyiruko n'abandi bose bagira uruhare mu kurwanya ihohoterwa rishingiye ku gitsina.

Mugire amahoro.

Me Munyankindi Monique

Perezida w'inama y'ubutegetsi y'umuryango Haguruka.

0. INTANGIRIRO

IBIRIMO

Iki gice gifasha abahugurwa kwibwirana no gusangira ubumenyi bafite ku bijyanye no gukumira no guhana ihohoterwa rishingiye ku gitsina. Iki gice gifasha umuyobozi w'ibiganiro gusuzuma ubumenyi abahugurwa bafite ku mategeko akumira n'ahana ihohoterwa rishingiye ku gitsina n'inzira uwahohotewe acamo kugira ngo abone ubufasha. Umuyobozi w'ibiganiro agomba kumenya neza icyo abahugurwa biteze mu mahugurwa.

Intego:

Nyuma y'iki kiganiro abahugurwa bazagira ubumenyi n'ubushobozi bukurikira:

1. Buri wese mu bahugurwa azaba yamenye amazina ya mugenzi we ndetse n'icyo akora;
2. Kumva no kubasha gusobanura uburyo iyi mfashanyigisho ikoreshwa;
3. Gushyiraho imirongo ngenderwaho ifasha amatsinda gukora neza;
4. Kumenya ubumenyi abahugurwa bafite ku mategeko akumira n'ahana ihohoterwa rishingiye ku gitsina n'inzira uwahohotewe acamo kugira ngo abone ubufasha;
5. Kumenya ubumenyi abahugurwa bifuzwa kunguka kubijyanye n'amategeko akumira n'ahana ihohoterwa rishingiye ku gitsina n'inzira uwahohotewe acamo kugira ngo abone ubufasha.

0.1. Kwibwirana no kumenyana

Iki gice kigizwe n'intambwe ebyiri

Intambwe ya 1: Urabaza ibibazo mugenzi wawe, hanyuma nawe akubaze.
(iminota 30)

1. Buri wese mu bahugurwa ahabwa agakarita (Reba igishushanyo);
2. Banza wibwire mugenzi wawe mwegeranye, hanyuma umusabe amakuru kugira ngo uyuzuze ku gakarita wahawe;
3. Andika neza amakuru uhawe ku gakarita, hanyuma ukagumane
4. Fata mu mutwe izina riri ku gakarita, kuko uwo ari umufatanyabikorwa wawe

Amazina: _____ _____

Icyo ukora: _____ _____

N i iyihe mpamvu yatumye witabira amahugurwa?:

1. Buri wese mu bahugurwa akoresheje agakarita abwira abahugurwa bose umwirondoro w'umufatanyabikorwa we (Umwirondoro wanditse ku gakarita);
2. Nyuma yo kuvuga umwirondoro w'umufatanyabikorwa wawe, gashyire ku meza imbere y' umufatanyabikorwa kuburyo buriwese ashobora gusoma ibyanditseho;

Intambwe ya 2: Uraganira n'abandi bitabiriye amahugurwa kugira ngo urusheho kubamenya

0.2 Kumenya indangagaciro

(Iminota 30)

Iki gice kigizwe n'intambwe ebyiri

Intambwe ya 1: Uyobora ibiganiro yandika indangagaciro ku mpapuro hanyuma akazishyira ahantu hanyuranye mu cyumba cy'amahugurwa. Ashobora gukoresha indangagaciro zikurikira:

1. Ubwubahane
2. Uburinganire
3. Urukundo
4. Agaciro

Intambwe ya 2: Buri wese mu bahugurwa atekereza bucece ku ndangagaciro zanditse ku mpapuro zashyizwe ku gikuta, hanyuma akajya guhagarara iruhande rw'indangagaciro ahisemo.

Abahugurwa bahisemo indangagaciro imwe bahita bakora ibi bikurira:

1. Kwibwirana hagati yabo buri wese avuga amazina ye, aho atuye ndetse n'icyo akora.
2. Babwirana hagati yabo impamvu yatumye bahitamo iyo ndangagaciro.
3. Uyobora ibiganiro asaba umwe mubagize buri tsinda rihuje indangagaciro kuvuga amazina y'abo bahuje indangagaciro, hanyuma agasobanura impamvu yatumye bahitamo iyo ndangagaciro (impamvu bumvikanyeho bose).

Gusangira ijambo

Uyoboye ibiganiro aganiriza abahugurwa uburyo indangagaciro zishobora gutuma amahugurwa agenda neza kandi bikaba umusingi wo kurwanya ihohoterwa rishingiye ku gitsina. Uyoboye amahugurwa abaza abahugurwa ikintu bumva cyakorwa kugira ngo amahugurwa agende neza (uyoboye ibiganiro ashobora gusaba abahugurwa kwishyiriraho amabwiriza agenga imyitwarire mugihe cy'amahugurwa.

(Urugero: Kubahiriza igihe, ubwubahane, kudakoresha telephone, n'ibindi....)

0.3. Gusuzuma ibyifuzo ndetse n'ubumenyi

(Iminota 30)

Buri wese mu bahugurwa asubiza wenyine ibibazo bikurikira:

1. Ni iki wumva uzungukira muri aya mahugurwa?
2. Ni ubuhe bumenyi wifuza gusangiza abandi muri aya mahugurwa?

IBYIFUZO N'UBUMENYI	
Ni iki wumva uzungukira muri aya mahugurwa?	Ubumenyi wifuza gusangiza abandi muri aya mahugurwa

Umwanzuro w'uhugura

Hashingiwe ku bitekerezo byatanzwe n'abitabiriye amahugurwa uhugura yandika muncamake ibyo abazahugurwa bifuzaga kumenya mu mahugurwa, amategeko azagenga ayo mahugurwa ndetse akanamenyeshya abitabiriye gahunda y'amahugurwa.

IGICE CYA MBERE:

IGISOBANURO CYO KUVUKA URI UMUKOBWA CYANGWA UMUHUNGU NO GUSOBANUKIRWA N'AMAGAMBO Y'INGENZI AZIFASHISHWA MU MAHUGURWA

IBIRIMO

Iki gice gifasha abahugura kugira ubumenyi bw'ibanze ku mitekerereze n'imyumvire ikoresha mugihe cy'ihohoterwa rishingiye ku gitsina. Ibyo bifasha abahugurwa gutekereza ku ihohoterwa rishingiye ku gitsina muri rusange mbere yo kuganira ku mategeko akoresha mu gukumira no guhana ihohoterwa rishingiye ku gitsina. Iki gice kandi gifasha abahugura gusobanukirwa n'amagambo y'ingenzi azifashishwa mu mahugurwa kugirango abaguhurwa bazajye bumva kimwe ibivugwa n'uhugura cyangwa na bagenzi babo.

Intego:

Nyuma y'iki kiganiro abahugurwa bazagira ubumenyi bukurikira:

1. Uburyo umuco cyangwa imyemerere bigena inshingano zigomba gukorwa n'abagabo gusa cyangwa abagore gusa kuva umuntu akivuka.
2. Gusobanura itandukaniro riri hagati y'igitsina mu buryo bw'umubiri (sex) no mu buryo bw'imitekerereze (gender).
3. Gusobanukirwa n'amagambo y'ingenzi azifashishwa mu mahugurwa.

Ibikoresho: Impapuro nini n'amakaramu manini

Isomo rya 1: Kuvuka uri umuhungu cyangwa umukobwa

(Iminota 30)

Uyoboye ibiganiro asaba abahugurwa gukora amatsinda abiri, hanyuma abagize buri tsinda bakaganira ku bibazo bukurikira:

1. Bisobanuye iki kuvuka uri umuhungu cyangwa umukobwa mu muryango nyarwanda?
2. Ni iki umuryango nyarwanda uba utegereje ku muhungu cyangwa umukobwa wavutse?
3. Ni irihe tandukaniro riri hagati y'umuhungu n'umukobwa kuva bavutse kugera ku myaka 25?
4. Ese mu muco nyarwanda harimo ibikorwa bigenewe abahungu n'ibigenewe abakobwa? Bivuge wuzuza iyi mbonerahamwe.

UMUHUNGU	UMUKOBWA

1. Nyuma y'ibiganiro mu matsinda, buri tsinda rigaragaza ibyo baganiriye. Saba abagize buri tsinda kugumishaho ikiganiro cy'ibyo baganiriyeho kugira ngo hatabaho gutandukira.
2. Baza abahugurwa ikibabwira ko umwana wavutse ari umukobwa cyangwa umuhungu. Ubasubiriremo ko igitsina bivuze itandukaniro kamere ry'umubiri hagati y'umukobwa n'umuhungu.
3. Nyuma y'iminota mike yo kuganira ku bibazo wababajije bigamije gusembura ibitekerezo, babaze uko abahungu n'abakobwa bitwara hashingiwe ku mucu n'imyemerere. Ubabaze igihe batangirira kwiga iyo myitwarire.
4. Ibisubizo byose batanze byandikwa ku rupapuro runini maze bigashyirwa ku rukuta ruri mu cyumba cy'amahugurwa aho buri wese mu bahugurwa ashobora kureba.

Umwanzuro w'uhugura

Wifashishije ibitekerezo by'abahugurwa sobanura itandukaniro riri hagati y'umuhungu n'umukobwa ndetse n'uburyo bitwara hashingiwe ku mucu nyarwanda ndetse n'uw' akarere abahurwa baherereyemo.

Isomo rya 2: Sobanukirwa n'amagambo y'ingenzi azifashishwa mu mahugurwa

(Iminota 30)

Uyoboye ibiganiro yandika amagambo y'ingenzi azifashishwa mu mahugurwa ariyo (ihohoterwa rishingiye ku gitsina, ubushyingiranwe, ubuharike, ubushoreke, ubusambanyi, gufata ku ngufu, gukoresha imibonano mpuzabitsina ku gahato uwo bashyingiranywe, guterura, kwigarurira umuntu hagamiywe kwishimisha, ibikorwa by'urukozasoni, igitsina, umuntu ugeze mu zabukuru, guhoza umuntu ku nkeke, ivangamutungo rusange, ivangamutungo w'umuhahano, ivanguramutungo risesuye, kuzungura) ku dupapuro duto agasaba abahugurwa kuza gutombora agapapuro kamwe.

Nyuma yo gutombora asaba abahugurwa gukora amatsinda y'abantu babiri, hanyuma abagize buri tsinda agaha mugenzi we igisobanuro cy'ijambo yatomboye bakaza kumvikana ku gisobanuro cy'amagambo abiri bombi batomboye.

Guhurira hamwe kw'abahugurwa bakoze uruziga buri wese agatanga ibisobanuro by'ijambo yatombeye noneho uhugura yasanga aribyo icyo gisobanuro akakimanika ahirengeye buri wese ashobora kureba igihe akurikira amahugurwa.

IBISOBANURO BY'AMAGAMBO Y'INGENZI

Ihohoterwa rishingiye ku gitsina: igikorwa icyo ari cyo cyose gikorwa umuntu haba ku mubiri, mu mitekerezwe, ku myanya ndangagitsina no ku mutungo, kubera ko ari uw'igitsina gore cyangwa uw'igitsina gabo. Icyo gikorwa kikamubuza uburenganzira bwe kandi kikamugiraho ingaruka mbi. Iryo hohoterwa rishobora gukorwa mu rugo cyangwa hanze yarwo.

Ubushyingiranwe: amasezerano yo kubana hagati y'umugore n'umugabo akozwe mu buryo bwemewe n'amategeko agenga abasezeranye

Ubuharike: Ni ukugira amasezerano ya kabiri (2) yo kubana ubushyingiranwe bwa mbere bugifite agaciro.

Ubushoreke: imibanire nk'umugabo n'umugore ku buryo buhoraho, ku bantu batashyiranywe ku buryo bwemewe n'amategeko mbonezamubano, umwe muri bo cyangwa bombi afite uwo bashyiranywe.

Ubusambanyi: imibonano mpuzabitsina ikozwe n'uwashyiranywe akayikorana n'uwo batashyiranywe.

Gufata ku ngufu: Ni ukukoresha undi muntu imibonano mpuzabitsina nta bwumvikane bubayeho, hakoreshejwe imbaraga, iterabwoba, amayeri n'ibindi.

Gukoresha imibonano mpuzabitsina ku gahato uwo bashyiranywe: igikorwa cyose kigamije imibonano mpuzabitsina gikozwe n'umwe mu bashyiranywe nta bwumvikane bubayeho, hakoreshejwe ingufu, iterabwoba, uburiganya n'ibindi.

Guterura: gutwara umuntu ukoresheje ingufu cyangwa amayeri hagamijwe kubana nk'abashyiranywe.

Kwigarurira umuntu hagamijwe kwishimisha: ibikorwa umuntu akorera undi agamije kwishimisha bishingiye ku gitsina, yitwaje igitsure, ububasha, umutungo cyangwa ubundi buryo ubwo ari bwo bwose. Ibyo bikorwa bishobora kuba bigamije gukora imibonano mpuzabitsina, gukorakora, kwambika ubusa, gufata amafoto, kwerekana umuntu yambaye ubusa cyangwa kumukinisha imibonano mpuzabitsina, gukoresha igitsina ku yindi myanya y'umubiri n'ibindi

Ibikorwa by'urukozasoni: ibikorwa bibangamira umuco bishingiye ku gitsina, bikorewe umuntu uwo ari we wese.

Igitsina: Ni imimerere umuntu afite nk'ikinyabuzima imugaragaza nk'umugabo cyangwa umugore.

Umuntu ugeze mu zabukuru: umuntu wese urengeje imyaka mirongo itandatu n'itanu (65) y'amavuko

Guhoza umuntu ku nkeke: guhora ukorera umuntu ibikorwa bimubuza amahoro nko kumutoteza, kumucyurira, kumucunaguza, kumugaya, kumutuka n'ibindi ...

Ivangamutungo rusange: Ni amasezerano abashyingiranywe bagirana bakumvikana gushyira hamwe umutungo wabo wose.

Ivangamutungo w'umuhahano: Ni amasezerano abashyingiranywe bagirana bakumvikana gushyira hamwe umutungo bazahaha bari kumwe kuva ku muni w'ishyingirwa, kimwe n'ibyo bungutse mu mibanire yabo, bakorera hamwe cyangwa buri wese ku giti cye, byaba impano cyangwa ibizungurwa.

Ivanguramutungo risesuye: Ni amasezerano abashyingiranywe bagirana bakumvikana gufatanya gutunga urugo rwabo hakurikijwe ubushobozi bwa buri wese, kandi buri wese akagumana uburenganzira bwo gucunga, kwikenuza, gutanga no kugurisha umutungo we bwite.

Kuzungura: Ni uguhabwa uburenganzira n'inshingano ku mutungo n'imyenda by'uwapfuye.

IGICE CYA KABILI:

AGACIRO KA MUNTU N'INCAMAKE Y'AMATEGEKO AKORESHWA MU GUKUMIRA NO GUHANA IHOHOTERWA RISHINGIYE KU GITSINA

IBIRIMO

Iki gice gifasha abahugurwa kumenya no kumva neza agaciro ka muntu ndetse no kumenya amategeko atandukanye akoreshwa mu gukumira no guhana ihohoterwa rishingiye ku gitsina. Ikindi ni uko abahugurwa barushaho gusobanukirwa n'abo itegeko rireba bese ndetse n'uburyo rikoreshe.

Intego

Nyuma y'iki kiganiro abahugurwa bazaba bafite ubumenyi n'ubushobozi bukurikira:

- Kumva neza impamvu umuntu ari umunyagitinyiro kandi arindwa n'itegeko
- Kumenya amategeko akoreshwa mu gukumira no guhana ihohoterwa rishingiye ku gitsina.
- Kumenya abarebwa n'amategeko bese.

Isomo rya 1: Imyumvire ishingiyeye ku gitsina

(Iminota 30)

Interuro zikubiye muri iyi mbonerahamwe zigaragaza ibitekerezo n'imyumvire binyuranye bishingiye ku gitsina. Soma interuro hanyuma ushyire akamenyetso mu kazu kabugenewe kagaragaza niba wemeranya n'interuro cyangwa utemeranya nayo maze usobanure impamvu y'igisubizo watanze. Si ngombwa gufata umwanya muremure wo gutekereza ku gisubizo gikwiye.

Interuro	Nibyo	Sibyoy	Sobanura impamvu
Abantu bese bavuka bigenga, kandi imbere y'amategeko banganya agaciro n'uburenganzira. Bafite ubwenge n'umutimanama kandi bagomba kubana mu mahoro			
Abagabo gusa niba bahohotera abagore			
Kirazira ko umugore yanga gukora imibonano mpuzabitsina n'uwo bashyingiranywe.			
Umugabo ni umutware w'urugo			
Umugabo niwe ugomba gutanga ibitunga urugo			

Isomo rya 2: Inzu y'urwunge rw'amategeko akoreshwa mu Rwanda (Iminota 90)


Intambwe ya 1. (Gusubiza ibibazo mu matsinda iminota 30)

Uyoboye ibiganiro agabanya abitabiriye amahugurwa mu matsinda ane buri tsinda rigasubiza ibibazo bikurikira :

1. Ese n'ubuho burenganzira n'inshingano uzi bijyanye n'ihohoterwa rishingiye ku gitsina uzi? turebe kubijyanye n'izungura, umurimo ndetse n'ubutaka ?
2. N'irihe hohoterwa rishingiye ku gitsina uzi ryiganje mu karere uturukamo?
3. Ese ni ibihe byaha muzi bijyanye n'ihohoterwa rishingiye ku gitsina muzi ?
4. Ese ibyo byaha biteganywa n'ayahe mategeko mu Rwanda ?

Intambwe ya 2. Kubaka no kuganira ku nzu ikubiyemo igisenge n'umusingi (iminota 60).

1. Nyuma yo gusubiza ibibazo mu matsinda ajyanye n'amategeko bazi akumira akanahana ihohoterwa rishingiye ku gitsina abitabiriye amahugurwa bagenda berekana ibisubizo babonye.
2. Uhugura agomba kuba yateguye ishusho y'inzu ifite umusingi, inkingi n'igisenge iri hasi noneho akagenda yuzuzamo ayo makuru uko abahugurwa bagenda berekana ibyo bagezeho mu matsinda ibyo batabonye akabibabwira.




3. Uyoboye ibiganiro amaze kubaka neza iyi nzu asaba abahugurwa kwitegereza neza igishushanyo cy'inzu y'urwunge rw'amategeko maze bakavuga niba hari itegeko ribura cyangwa se ryacyuye igihe;
4. Abasaba kandi gukora amatsinda atatu maze abagize buri tsinda bagasubiza ibibazo bikurikira:

1. Ni iyihe mpamvu yatumye itegeko Nshinga rigirwa **igisenge**? Hakoreshejwe urupapuro runini abagize itsinda bashushanya igisenge gisa n'icy'itegeko nshinga;
 2. Ni iyihe mpamvu amategeko akoreshwa mu gukumira no guhana ihohoterwa rishingiye ku gitsina yagizwe **inkingi**? Hakoreshejwe urupapuro runini abagize itsinda bashushanya inkingi zisa n'iziri ku gishushanyo
 3. Ni iyihe mpamvu **uburinganire, agaciro ka muntu, no kutavangura** byagizwe **umusingi**? Hakoreshejwe urupapuro runini abagize itsinda bashushanya **umusingi** usa n'uri ku gishushanyo;
2. Uhagarariye buri tsinda agaragaza ibisubizo byatanzwe;

Nyuma yo kujya impaka ku bisubizo byatanzwe, uyoboye ibiganiro asobanurira abahugurwa ko itegeko nshinga ari ryo tegeko risumba ayandi yose mu Rwanda kandi niyo mpamvu yatumye rigirwa **igisenge**. Andi mategeko, akoreshwa mu gukumira no guhana ihohoterwa rishingiye ku gitsina yagizwe **inkingi** kuko ariyo asobanura mu buryo buziguye ibijyanye n'uburinganire bw'abagabo n'abagore, ihohoterwa rishingiye ku gitsina, ibibujijwe, ibihano, uburenganzira bw'abagabo n'abagore ndetse n'inshingano. Naho amagambo agize **umusingi** uko ari atatu asobanuye ibitekerezo bitatu bikubiye mu rwunge rw'amategeko akoreshwa mu gukumira no guhana ihohoterwa rishingiye ku gitsina haba ku rwego rw'igihugu no ku rwego mpuzamahanga.

3. Nyuma yo gusobanura igishushanyo, uyoboye ibiganiro asaba abahugurwa gukorera hamwe maze bakubaka inzu isa n'iri ku gishushanyo cy'inzu y'urwunge rw'amategeko;

Isomo rya 3: Uwo amategeko areba (Iminota 30)



Uyoboye ibiganiro asaba abahugurwa kwitegereza bitonze igishushanyo kigaragaza abo amategeko areba bose. Hanyuma bagakora ibi bikurikira:

1. Buri wese mu bahugurwa ahabwa udukarita 10;
2. Buri gakarita kandikwaho undi muntu utavuzwe mu buryo buziguye (udukarita twose dushyirwa ku gikuta aho abahugurwa bose bareba);
3. Ese hari umuntu uri hejuru y'amategeko? Sobanura igisubizo cyawe;
4. Ese hari umuntu amategeko arenganya? Sobanura igisubizo cyawe.

IHOHOTERWA RISHINGIYE KU GITSINA

Birashoboka ko wakorewe ihohoterwa cyangwa warikoreye undi muntu kubera zimwe mu mpamvu zikurikira:

1. Ari umukobwa cyangwa ari umuhungu
2. Ari umugabo cyangwa umugore

IGICE CYA GATATU:

IHAME RY'UBURINGANIRE HAGATI Y'UMUGABO N'UMUGORE

IBIRIMO

Iki gice gikubiyemo inyigisho zifasha uhugurwa kumva ihame ry' uburinganire hagati y'umugabo n'umugore nkuko biteganywa n'itegeko nshinga rya 2003 nkuko ryavuguruwe muri 2015.

INTEGO

Nyuma y'iki kiganiro abahugurwa bazaba bafite ubumenyi n'ubushobozi bukurikira

- Ihame ry' uburinganire hagati y'umugabo n'umugore nkuko biteganywa n'itegeko nshinga rya 2003 nkuko ryavuguruwe muri 2015
- Ihame ry'uburinganire hagati y'abana b'abahungu n'abakobwa

Isomo rya 1: Uburinganire hagati y'abashakanye

(Iminota 90)



“Abashyingiranywe bafatanya ubuyobozi bw’urugo rwabo harimo kurwitaho kugira ngo rugwize umuco mwiza n’ibirutunga no kurwubaka rugakomera”

1. Uyoboye ibiganiro asaba abahugurwa gusesengura igishushanyo ndetse n’amagambo agiherekeje;
2. Saba abahugurwa gukora amatsinda ane (4);
3. Saba buri tsinda kuganira no gusubiza ibibazo bikurikira:
4. *Bisobanuye iki kuba umutware w’urugo?*
5. *Bisobanuye iki iyo abashakanye uko ari babiri ari abatware b’urugo?*

6. *Byagenda gute igihe umugabo ari we wenyine ufata umwanzuro mu rugo?*
7. *Byagenda gute igihe umugore ari we wenyine ufata umwanzuro mu rugo?*
8. *Ni ubuhe buryo bwakoreshwa mu gufata umwanzuro hagati y'abashakanye?*
9. *Bisobanuye iki kuvugako Abashyingiranywe bafite uburenganzira n'inshingano bingana?*

Nyuma yo gusubiza ibibazo basabe kugaruka maze uhagarariye buri tsinda asobanure ibisubizo byatanzwe n'abagize itsinda?

Kungurana ibitekerezo :

Ikiganiro mu matsinda :

Abahugurwa barigabanyamo amatsinda ane baganire kuri iki kibazo baze no kubwira bagenzi babo mu itsinda rusange igisubizo babonye.

Bananiye yashakanye na Nyirandarwemeye bafitanye abana umunani ariko Bananiye ni umusinzi kandi akunda gutaha nijoro. Umunsi umwe Nyirandarwemeye yafunguye radiyo yumva hari umuntu usobanura ihame ry'uburinganire avuga ko abashyingiranywe bafite uburenganzira n'inshingano bingana. Amaze kumva icyo kiganiro abitekerezaho cyane yibuka ukuntu yita kubana wenyine mu dufaranga duke yakoreye naho umugabo we ayo yakoreye akayanywera ahita afata icyemezo ko nawe agomba kujya ajya anywera ayo yakoreye ndetse nawe agataha nijoro kugeza igihe umugabo we azisubiraho.

Ese urumva Nyirandarwemeye yarubahirije ihame ry'uburinganire ?

Isomo rya 2: Ni nde wakora ibi bikurikira hagati y'umugore n'umugabo?

(Iminota 30)

Buri umwe mubahugurwa ahabwa urupapuro agasabwa ibi bikurikira:


Ca umurongo uhuza ishusho y'umugabo, umugore cyangwa bombi ugendeye ku buryo ubitekereza cyangwa ubiyumvamo.

Ni nde wakora ibi bikurikira?

10. Kuyobora urugo
11. Guhahira urugo
12. Kurera abana
13. Gutwara inda
14. Gufata ku ngufu
15. Kwambara ipantaro
16. Gutanga inkwano
17. Kubyara
18. Kuvura
19. Guca inyuma uwo bashakanye
20. Kurwana



21. Gusambanya umwana
22. Koza amasahani
23. Gusinda
24. Gutwara igare
25. Kurya ihene
26. Kuzungura
27. Gufungwa
28. Guterura
29. kwiba
30. Kugura inzu
31. Gukora ihohoterwa rishingiye ku gitsina



UMWANZURO

Uhugura agomba gushimangira ko ihame ry'uburinganire hagati y'abagabo n'abagore riteganywa n'itegeko nshinga. Abanyarwanda biyemeje kubaka Leta igendera ku mategeko, ishingiyeye ku iyubahirizwa ry'uburenganzira bwa muntu, ku bwisanzure no ku ihame ry'uko Abanyarwanda bose bareshya imbere y'amategeko n'iry'uburinganire hagati y'abagore n'abagabo.

<p>Kureshya imbere y'amategeko</p> 	<ul style="list-style-type: none"> • Umuntu ni umunyagitinyiro kandi ni indahungabanywa. • Abantu bose barengerwa n'amategeko ku buryo bungana • Abagabo n'abagore barareshya imbere y'amategeko • Kuvangura abana hashingiye ku gitsina birabujijwe
---	--

IGICE CYA KANE:

GUKUMIRA IHOHOTERWA RISHINGIYE KU GITSINA KU BIJYANYE N'IMICUNGIRE Y'UMUTUNGO W'ABASHYINGIRANYWE, IMPANO N'IZUNGURA

IBIRIMO

Iki gice gikubiyemo inyigisho zifasha uhugurwa kumva neza gukumira ihohoterwa rishingiye ku gitsina nk'uko bikubiye mu mategeko akena imicungire y'umutungo w'abashyiranywe, impano n'izungura.

INTEGO

Nyuma y'iki kiganiro abahugurwa bazaba bafite ubushobozi n'ubumenyi bukurikira:

- Gusobanukirwa neza ikumira ry'ihohoterwa uko rikubiye mu mategeko arengera abana
- Gusobanukirwa neza ikumira ry'ihohoterwa uko rikubiye mu mategeko akena imicungire y'umutungo w'abashyiranywe, impano n'izungura.
- Gusobanukirwa neza n'ihame ry'uburenganzira bungana ku butaka

Hifashishijwe inkuru y'irage rya nkubito n'ibiganiro mu matsinda

Isomo rya 1: Abana b'abahungu n'abakobwa

(Iminota 60)

INKURU YA 1: Irage ryo kwa Nkubito



Nkubito w'imyaka 86 yashakanye na Nyirangirente babyarana abana barindwi: abahungu babiri n'abakobwa batanu. Mu minsi ishize Nkubito yatangiye kwiyumvamo imbaraga nke maze ateguka umugore we guhamagara abana be bese kugira ngo abarage. Yasabye abahungu be kuzaba abagabo, asaba abakobwa kwitwara neza bakubaha abagabo babo. Ku bijyanye n'imitungo,

yavuze ko ubutaka bwe bwa hegitari imwe bugabanywamo kabiri buri muhungu agatwara igice bagasigaza inzu Nyirangirente azasigaranamo n'umukobwa wabo muto.

Yategetse ko inka 9 yari atunze hazakurwamo imwe izajya ikamirwa Nyirangirente n'umukobwa wabo muto utarashaka naho izisigaye umunani zigahabwa abahungu be bakazigabana, buri wese agatwara enye. Yasabye akomeje ko abahungu basigara bita kuri Nyirangirente na mushiki wabo muto ntibazagire icyo babura.

Ibiganiro mu matsinda

Uyoboye ibiganiro asaba abahugurwa gukora amatsinda y'abantu babiri maze buri tsinda rigasubiza ibibazo biri hefwo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

1. *Niibihe bikorwa bibujijwe n'amategeko byagaragaye mu irage rya Nkubito?*

2. *Vuga abantu barenganye muri iri rage , usobanure n'impamvu.*

3. *Hakorwa iki ngo abo bantu barenganurwe?*

Uyoboye ibiganiro asobanurira abahugurwa ko abana bose, abahungu n'abakobwa, bafite uburenganzira bungana ku mutungo w'ababyeyi babo. Babwire ko irage rigaragayemo ivangura rishingiye ku gitsina ritemewe kandi ko nta gaciro rigira. Ikindi nuko umugore wa Nkubito afite uburenganzira ku mitungo ya Nkubito hashingiye ku icungamutungo bahisemo.

Isomo rya 2: Izungura rya Nyakwigendera Nkubito

(Iminota 60)

Uyoboye ibiganiro asaba abahugurwa gukora amatsinda atatu (3). Buri tsinda riganira ku izungura ry'imitungo yasizwe na Nyakwigendera Nkubito hakurikijwe uburyo bumwe bw'icungamutungo (**ivangamutungo risesuye, ivangamutungo muhahano, ivanguramutungo**).

Nyuma yo kuganira mu matsinda, abagize amatsinda bagaragaza ibyo baganiriye.

Ibibazo:

Itsinda rya 1: Vuga ibyo buri wese mu bazungura ba Nkubito agomba kuzungura mu gihe yaba yarasezeranye ivangamutungo risesuye.

Itsinda rya 2: Vuga ibyo buri wese mu bazungura ba Nkubito agomba kuzungura mu gihe yaba yarasezeranye ivangamutungo muhahano.

Itsinda rya 3: Vuga ibyo buri wese mu bazungura ba Nkubito agomba kuzungura mu gihe yaba yarasezeranye ivanguramutungo.

ICYO KUZIRIKANA

Nyuma yo kugaragaza ibyo buri tsinda ryaganiriye, uyoboye ibiganiro asobanurira abahugurwa ko abana bose bangana imbere y’amategeko. Abana b’abakobwa bafite uburenganzira bungana n’ubwa basaza babo mu gihe cy’izungura. Ikindi n’uko umugore cyangwa umugabo wa Nyakwigendera afite uburenganzira bwo kuzungura uwo bashyingiranywe hashingiwe kw’icungamutungo basezeranye. Ni ngombwa kwibutsa abahugurwa ko bibujiwe kugabana ubutaka buri muni ya hegitari imwe ahubwo bugurishwa abazungura bakagabana amafaranga.

<p>Uburenganzira inshingano &</p> 	<ul style="list-style-type: none"> • Abashyingiranywe bafite uburenganzira n’inshingano bingana. Bafatanya mu buryo bungana ubuyobozi bw’urugo rwabo;
	<ul style="list-style-type: none"> • Ihohoterwa rishingiye ku gitsina ni imwe mu mpamvu zemewe n’amategeko zituma abashyingiranywe batandukana;
	<ul style="list-style-type: none"> • Iyo umwe mu bashakanye apfuye kandi yari yarasezeranye ivangamutungo, umutungo wose wegukanwa n’uwapfakaye kandi agakomeza kurera abana hakurikijwe icungamutungo bahisemo;
	<ul style="list-style-type: none"> • Iyo uwapfakaye yiyemeje kongera gushaka kandi yari afite abana, umutungo ugabanywamo kabiri, agatwara igice kimwe ikindi kikagabana n’abana bose mu buryo bungana hakurikijwe icungamutungo bahisemo;
	<ul style="list-style-type: none"> • Abashyingiranywe byemewe n’amategeko bafite uburenganzira bungana ku butaka hakurikijwe icungamutungo bahisemo

IGICE CYA GATANU:

KURINDWA IHOHOTERWA RISHINGIYE KU GITSINA RISHINGIYE K'UMURIMO

Iki gice gikubiyemo inyigisho zifasha gusobanukirwa gukumira ihohoterwa nkuko rikubiyemo mu itegeko ry'umurimo.

Intego

Nyuma y'iki kiganiro abahugurwa bazaba bafite ubushobozi n'ubumenyi bukurikira:

- Gusobanukirwa uburenganzira bw'abakozi b'abagore
- Gusobanukirwa n'ihohoterwa rishingiye ku gitsina rishobora gukorerwa ku kazi

Isomo rya 1: Ivangura mu itangwa ry'akazi rishingiye ku gitsina

INKURU YA 2: Itangwa ry'akazi



Nyuma yo gutsinda ikizamini cy'akazi, Umuhire Gaby yatumiwe n'umuyobozi w'ikigo gitwara abagenzi kugira ngo bashyire umukono ku masezerano. Umuyobozi mukuru witwara Mutware yatunguwe no kubona umugore yinjira mu biro bye. **“Nitwa Umuhire Gaby, ni njyewe watsindiye ikizamini cy'akazi”**. Mutware yatunguwe no kumenya ko uwatsindiye akazi ari umugore kandi amaze igihe gito ashyingiwe. Mutware yasabye Umuhire gutaha kandi amubwira ko azamuhamagara nyuma yo gutegura amasezerano. Nyuma y'ukwezi, Umuhire yasubiyeyo kubaza impamvu batongeye kumuhamagara, maze Mutware amubwira ko akazi bagahaye umugabo kuko basanze ko nta mugore wagashobora. Ikindi n'uko bitari gushoboka ko akazi gahagarara igihe Umuhire yaba atwite cyangwa yabyaye.

Ibiganiro mu matsinda (Iminota 60)

Uyoboye ibiganiro asaba abahugurwa gukora amatsinda y'abantu babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bese gutanga ibitekerezo.

1. *Ese hari ihohoterwa rishingiye ku gitsina ryabayeho? Sobanura igisubizo cyawe.*

2. *Ese hari amategeko arengera Umuhire Gaby? Niba ahari, ni ayahe?*

3. *Ni ubuhe bufasha bwahabwa Umuhire Gaby? yabuhabwa na nde?*

4. *Niizihe nshingano Mutware afite? Azifite mu ruhe rwego? Iyo atazubahirije bigenda gute?*

Umwanzuro

Uburenganzira bwo kurindwa ivangura ku kazi buteganywa n'ingingo ya 16 y'itegeko nshinga aho iteganya ko abanyarwanda bese bavuka bafite uburenganzira n'ubwisanzure bingana. Ingingo ya 9 y'itegeko rigenga umurimo mu Rwanda iteganya ko umukoresha agomba guha abakozi amahirwe angana mu kazi. Umukoresha abujijwe gukora ivangura mu kazi rishingiye ku bwoko, ku muryango cyangwa ku gisekuru, ku nzu, ku ibara ry'umubiri, ku gitsina, ku karere, ku byiciro by'ubukungu, ku idini cyangwa ukwemera, ku bitekerezo, ku mutungo, ku itandukaniro ry'umuco, ku rurimi, ku bumuga bw'umubiri cyangwa ubwo mu mutwe no ku rindi vangura iryo ari ryo ryose. Umukoresha wese agomba guhamba umushahara ungana abakozi bakora imirimo y'agaciro kangana nta vangura iryo ari ryo ryose.

Isomo rya 2: Ikiruhuko cyo kubyara

INKURU YA 3: Ibaruwa isubiza Munyakazi

Koperative Ingenzi
Akarere ka Busasamana
Umurenge wa Rwamenyo
Akagari ka Gisubizo
Umudugudu w’Inyarurembo
Agasanduku k’Iposita: 234 Busasamana
Telefone: +250

Busasamana kuwa 15 Ugushyingo 2018

Kuri Bwana Munyakazi,

Impamvu: Gusubiza ibaruwa isaba uruhushya

Nyuma yo kubona ibaruwa yawe yo kuwa 13 Ugushyingo 2018 isaba uruhushya rw’iminsi ibiri kubera impamvu z’uko umufasha wawe yibarutse umwana, mbabajwe no kukumenyesha ko bidashoboka muri iki gihe.

Nk’uko ubizi, nta wundi mukozi dufite wagusimbura mu gihe udahari kandi kumara iminsi ibiri udahari byateza koperative igihombo gikomeye. Ni muri urwo rwego tugusaba kwihanganira imbogamizi zikomeye zitumye utabasha kubona uruhushya.

Tubashimiye uburyo muzihanganira uyu mwanzuro ndetse n’ubwitange mukomeje kugaragaza mu mirimo mushinzwe.

Tubifurije ubuzima bwiza hamwe n’umuryango wanyu.

Nimwonkwe!



NDAKIZE Yohani
Umuyobozi Mukuru wa Koperative

Ibiganiro mu matsinda: (Iminota 60)

1. Nyuma yo gusoma ibaruwa isubiza Munyakazi, saba abahugurwa gukora amatsinda abiri (**Iry'abagore ni ry'abagabo**);
2. Baza itsinda ry'abagabo uko bari kwitwara mu cyimbo cya Munyakazi;
3. Baza itsinda ry'abagore uko umugore bimugendekera iyo abyaye umugabo adahari;
4. Saba abagize buri tsinda gusubiza ibibazo byabajijwe maze bagaruke bagaragaze ibisubizo byatanzwe

Uyoboye ibiganiro asaba abahugurwa gukora amatsinda y'abantu babiri babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bese gutanga ibitekerezo.

1. *Ese ubona iyi baruwa yubahirije amategeko?*

2. *Ese hari uburenganzira bwa Munyakazi butubahirijwe? Niba buhari, ni ubuhe?*

3. *Ni ubuhe bufasha Munyakazi akeneye? Yabuhabwa na nde?*

4. *Ni izihe nshingano Ndakize afite? Azifite mu ruhe rwego ? Iyo atazubahirije bigenda gute ?*

5. *Ese birakwiye ko umugore wabyaye ahabwa ikiruhuko cy'amezi atatu (3) naho umugabo we agahabwa iminsi ine (4) gusa?*

INCAMAKE

Uhugura agomba kwibutsa abahugurwa ko uretse ikiruhuko cyo kubyara gihabwa abakozi babyaye, Ingingo ya 59 y'itegeko rigenga umurimo mu Rwanda iteganya ko mu gihe cy'amezi cumi n'abiri (12) uhereye igihe umukozi w'igitsina gore wabyaye yasubiriye ku kazi, umubyeyi afite uburenganzira ku kiruhuko cyo konsa cy'isaha imwe (1) ku muni. Ikiruhuko cyo konsa umukozi w'igitsina gore yemererwa n'amategeko gikurwa ku masaha y'akazi kandi agomba kugihemberwa.

Isomo rya 3: Guhoza undi ku nkeke ku kazi bifitanye isano n'imibonano mpuzabitsina

INKURU 4: Guhoza ku nkeke



Nyiraneza akora akazi ko mu rugo kwa Karenzi. Abanye neza n'abana baho ndetse baramukunda cyane bigatuma nyirabuja amwizera, kugeza aho yiyemeje kumwongeza umushahara. Mu minsi ishize, Karenzi yatangiye kujya yiyegereza Nyiraneza, agashaka kumukorakora ku mabere, amubwira ko ari mwiza cyane yifuza ko baryamana. Nyiraneza yaramuhungaga ndetse amubwira ko bidashoboka kuko amufata nk'umubyeyi byongeye kandi ari umukoresha we. Karenzi yamubwiye ko naramuka abibwiye nyirabuja azahita amwirukana agataha amara masa! Nyiraneza yabuze uko abyifatamo araruka ararumira. Karenzi yakomeje gutitiriza ariko Nyiraneza aranga. Umunsi umwe, Nyiraneza yafashe icyemezo cyo gutaha kuko atari ashoboye kwihanganira ibikorwa bya Karenzi.

Ibiganiri mu matsinda (Iminota 60)

Uyoboye ibiganiri asaba abahugurwa gukora amatsinda y'abantu babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiri asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

1. Ese hari ibikorwa bibujijwe n'amategeko byakozwe? Niba bihari, bivuge

2. Ni ubuhe bufasha Nyiraneza akeneye? Yabuhabwa na nde?

3. N'izihe nshingano Karenzi afite? Azifite mu ruhe rwego? Bigenda gute iyo atazubahirije?

UMWANZURO

Uhugura asubira mu ncamake uburenganzira n'inshingano bijyanye no gukumira ihohoterwa rishingiye ku gitsina bikomoka ku kazi nkuko biteganywa n'itegeko ry'umurimo ndetse n'andi mategeko. Ingingo ya 8 y'itegeko rigenga umurimo mu Rwanda ribuza guhoza ku nkeke uwo ukuriye mu kazi hagamijwe imibonano mpuzabitsina. Guhoza ku nkeke uwo ukuriye mu kazi hagamijwe imibonano mpuzabitsina ku buryo ubwo ari bwo bwose birabujijwe. Kwirukana umukozi ku kazi kubera ko yatanze amakuru cyangwa ubuhamya ku bijyanye no guhozwa ku nkeke hagamijwe imibonano mpuzabitsina bikoze n'umukuriye mu kazi birabujijwe. Igihe hari ibimenyetso bifatika byemeza ko umukozi yasezeye ku kazi kubera guhozwa ku nkeke n'umukuriye agamije gukorana na we imibonano mpuzabitsina, bifatwa nko kwirukanwa ku kazi nta mpamvu.

Uburenganzira & inshingano 	Umukoresha agomba guha umugore wabyaye ikiruhuko cy'amezi atatu akurikirana (ibyumweru 12);
	Umukoresha agomba guha umugabo ikiruhuko cy'iminsi ine (4) igihe umugore we yabyaye;
	Umuntu wese afite inshingano yo gutanga amakuru ku ihohoterwa rishingiye ku gitsina ryakozwe;

IGICE CYA GATANDATU:

IBYAHA N'IBIHANO BYABYO BIJYANYE N'IHOHOTERWA RISHINGIYE KU GITSINA

Ibirimo

Iki gice gikubiyemo inyigisho zifasha uhugurwa kumva neza ibyaha n'ibihano bijyanye n'ihohoterwa rishingiye ku gitsina.

Intego

Nyuma y'iki kiganiro abahugurwa bazaba bafite ubushobozi n'ubumenyi bukurikira:

- Gusobanukirwa neza ibyaha byose bijyanye n'ihohoterwa rishingiye ku gitsina
- Gusobanukirwa ibihano by'ibyaha bijyanye n'ihohoterwa rishingiye ku gitsina
- Gusobanukirwa itegeko rikubiyemo ibyaha n'ibihano bijyanye n'ihohoterwa rishingiye ku gitsina.

Isomo rya 1: Ibikorwa bigize ihohoterwa rishingiye ku gitsina

INKURU YA 5: Inkwano za Mugabo



Mugabo na Murorunkwere barubatse ndetse bafitanye abana batatu. Mugabo akora umwuga w'ubwubatsi naho Murorunkwere acuruza inyanya mu isoko riri hafi y'urugo rwabo. Ubwo bajyaga gushyingirwa Mugabo yatanze inkwano nyinshi kugira ngo umuryango yashatsemo utazamusuzugura. Nyuma yo gushyingirwa Mugabo yahaye Murorunkwere igishoro ngo aje gucuruza inyanya mu isoko ndetse amubwira ko agomba kumwubaha no gukora cyane kuko yamukoye amafaranga menshi. Yamubwiye ko nibimunanira azashaka undi mugore wubaha umugabo kandi uzi no gukora.

Murorunkwere yazindukaga mu gitondo cya kare agatunganya mu rugo ndetse akanategura ifunguro rya mu gitondo. Hanyuma agahita ajya mu isoko kurangura inyanya agomba gucuruza uwo muni. N'ubwo yatahaga ananiwe cyane, yagomba kuvoma amazi, gutegura ifunguro rya nimugoroba, kumesa imyenda ndetse no kwita ku bana be bato.

Mugabo yafataga amafaranga umugore we yakoreye akajya kuyanywera inzoga agataha mu gicuku aririmba izo yakoye umugore we. Nubwo Murorunkwere yabaga ananiwe, Mugabo yamukoreshaga imibonano mpuzabitsina ku ngufu. Hari n'ubwo yajyaga asohora umugore mu nzu akamuraza hanze kubera ko ibiryo bidashyushye. Mugabo yahoraga yigamba ko amafuti y'umugabo ari bwo buryo bwe ndetse ko nta muntu n'umwe wamuvogera mu nzu yiyubakiye. Abaturanyi bose batinyaga Mugabo bigatuma birengagiza ibibazo Murorunkwere ahura nabyo. Murorunkwere agira ipfunwe ryo kuganira n'abaturanyi ku bibazo afite. N'ubwo yahoranaga ibikomere mu maso, yararucaga akarumira.

Ibiganiro mu matsinda (Iminota 90)

1. Uyoboye ibiganiro asaba abahugurwa gukora amatsinda ane.
2. Buri tsinda risubiza ibibazo byabajijwe hepfo;
3. Nyuma yo kuganira no gusubiza ibibazo byabajijwe, buri itsinda rigaragaza ibyo ryagezeho.

Ibibazo:

1. *Ni ibihe bikorwa by'ihohoterwa rishingiye ku gitsina bigaragara muri iyi nkuru?. Byandike mu kazu gahuye n'ubwoko bw'ihohoterwa rishingiye ku gitsina.*
2. *Andika ibindi bikorwa by'ihohoterwa waba uzi, kandi ubihuze n'ubwoko bw'ihohoterwa buri mu mbonerahamwe.*
3. *Ni izihe nzira Murorunkwere yari gukoresha kugira ngo abone ubufasha?*

Ihohoterwa ribabaza umubiri	Ihohoterwa rishingiye ku mutungo
Ihohoterwa rikomeretsa umutima	Ihohoterwa rikorewe ku gitsina

Isomo rya 2: Kwangiza umwana

1. Uyoboye ibiganiro asaba abakorerabushake babiri gukina ikinamico yitwa **“ubuntu bwa bihehe”** Byaba byiza habonetse umugabo n’umugore;
2. Bakoresheje inyandiko, saba abakorerabushake gukina ikinamico

INKURU YA 6: Ikinamico “ ubuntu bwa Bihehe”



Bihehe ni umucuruzi w’imigati mu gasantire ka Rugero. N’ubwo atize amashuri menshi, ari mu bantu bafite ijambo rikomeye aho atuye. Mutoni ni umukobwa wa Karangwa. Afite imyaka 15, ageze mu mwaka wa kabiri w’amashuri yisumbuye. Mutoni afite igikuriro gitangaje ku buryo iyo agendana na nyina ubona amusumba. Mutoni bamutumye kugura umugati kwa Bihehe.

BIHEHE: Amakuru Muto?

MUTONI: Ni meza! Mufite umugati?

BIHEHE: Umugati wo guha umukobwa nkawe nawubura koko? Ahubwo sha nyegera umpobere! Ubona ntaba ngukumbuye koko?

MUTONI: Uhm...unkumbuye? Ubundi se uranzi?

BIHEHE: Umva nawe ra! Umukobwa wuje uburanga nkawe se ni gute ntamumenya? Kereka ntatuye muri Rugero!!

MUTONI: [aseka] Ubu se ndi mwiza?

BIHEHE: Uhm... ubu se ni jye wa mbere ubikubwiye? Ahubwo impamvu ntigeze mbikubwira mbere nugutinya mama wawe. Bavuga ko agira amahane !

MUTONI: Buriya se agira amahane? Jyewe simbibona! Gusa ntakunda abasore bamvugisha kuko nkiri muto!

BIHEHE: Ugize uti muto? Wabaye inkumi da? Reba uko ureshya, wameze amabere [ari ko amwegera], ugeze mu mashuri yisumbuye...ahubwo ujye wirinda abasore babi badafite icyo baguha!

MUTONI: Ahaaa..Simbizi rwose! Umugati ni angahe?

BIHEHE: Ese urihutishwa n'iki ko utagiye ku ishuri, umugati si uw'ejo mu gitondo?

MUTONI: Yego, ariko ngomba gutaha mama arantegereje.

BIHEHE: Umugati ntabwo nkwishyuzwa rwose! Ese Muto, ubundi uzansura ryari ngo tunganire nk'abantu bakuru?

MUTONI: Tuzabivugana ubutaha!

BIHEHE: Umva kandi, ubutaha se ryari ko kenshi uba uri ku ishuri ukahava utaha, Kandi jye n'ejo ndahari rwose!

MUTONI: Ejo ntibyashoboka nzaba ndi ku ishuri.

BIHEHE: Ibyo ntibigutere ikibazo, n'iyi waza ejo mu gitondo! Ahubwo mpa nimeru yawe nzakuvugisha!

MUTONI: Nta telefoni ngira nkoresha iya mama!

BIHEHE: uhhh... Bishoboka bite se ko umukobwa nkawe atagira telefoni?! Ahubwo uzaze ejo mu gitondo nzaguha telefoni nziza ya taci

MUTONI: Yeee?? Nibyo se koko wayimpa cyangwa urambeshya ngo wumve icyo mvuga?

BIHEHE: Oya ni ukuri nzayiguha...wowe uzaze gusa!

MUTONI: Yeweee, sha ejo nzaza pe! Ahubwo reka ntahe ubwo ni ah'ejo...iwawe se ko mpazi..!!

BIHEHE: Yego sha, wowe uzaze rwose urisanga! Gusa ntubibwire mama, urabizi sinamukira!!!

MUTONI: [mu mutima] ahaaaa...nyamara uyu mugabo ni umwana mwiza...umuntu wemeye kumpa telefone nta kintu kidasanzwe tuziranyeho? Ndumva nanjye mukunze pe!!!

BIHEHE: [yicinya icyara...] hahaahaha!!! Ariko ningende Rutindi BIHEHE imana zaranyereye koko!! Aka kana rwose nta gushidikanya nzagakuramo icyacumi tu! N'ubwo kakiga bwose, nzakumva ikizaba nzanywa umuti jye BIHEHE mwene Ntawugashira!

Mu gitondo, Mutoni yariteguye ava mu rugo nk'ugiye ku ishuri ariko ajya kwa BIHEHE. BIHEHE yari akiri mu rugo iwe yiteguye ko Mutoni amusura. Mu ma saa mbiri, Mutoni aba arahageze arakomanga....

MUTONI: Hodi hodi!!!

BIHEHE: Karibu karibu cheri!!! Sinasinziriyeye naraye ngutekereza!!!

MUTONI: Umeze ute se? Sha nanjye nsa n'utasinziriyeye!

BIHEHE: ndishimye rwose! Ngaho icara hano nari nicaye! Nkuzimanire iki se? Jye ninywera agahiye ndumva twasangira!

MUTONI: Ubwo jye ni fanta! Jye se ko ntanywa inzoga!

BIHEHE: Oya ntacyo nyine ubwo urabyiga kuko dukundana twabaye umwe nta kibazo...kandi erega umaze no kuba inkumi wasomaho gake ukaba umukobwa w'umusirimu...ntubibona se wowe? Hanyuma turarya maze turuhuke....!!!

MUTONI: Eee... ntacyo reka dusangire noneho da!!!

BIHEHE: Humura nta kibazo rwose! Ahubwo akira impano yawe ya telefone...nta muriro ifite, banza uyishyire ku muriro!

MUTONI: Yebaba weee.... Rube, urakoooooze urakoze cyane! Ubu sinzongera gukoresha iya mama! Kandi nawe tuzajya tuvugana buri muni!

BIHEHE: Oya nta kibazo rwose! Ariko nakubwiye ko ngukunda? Ntacyo nakwima umukobwa mwiza nkawe! Ahubwo egera hino dusangire!

MUTONI: [Hashize akanya...] Bihe, ko numva mfite isereri? Umenya nasinze! Ni iki washyize muri izi nzoga?

BIHEHE: Oya ntacyo ahubwo ni uko utabimenyereye...ngaho ngwino mu cyumba uruhuke gato!

MUTONI: [uko ahagaze ntabashe gushinga...] ntabyo nashobora Bihe, ndumva ntashobora guhagarara!

BIHEHE: Ntacyo reka nguterure mpakugeze mukunzi mwiza

MUTONI: [akangutse...] Ibi ni ibiki Bihe? Imyenda yanjye iri he? Ahubwo se nakomerekejwe n'iki?

BIHEHE: Humura Muto, vuga buhoro! Imyenda yawe ngiriyi aho imanitse...amaraso yo ntugire ikibazo birarangira!

MUTONI: Oya mbwira...byagenze bite? Yooo...mama aranyica noneho...kandi nasibye n'ishuri

BIHEHE: Humura ntabyo ari bumenye, ahubwo ambara utahe buriye bata kubaza aho watinze. Ntiwibagirwe telefone yawe icometse muri salo!

MUTONI: [arira...] oya nushaka unayigumane uri umugome gusa... ubu se ndavuga ko byagenze bite? Ntuzongere no kumvugisha!

Ibiganiro mu matsinda (Iminota 60)

1. Nyuma yo kureba no kumva ikinamico, saba abahugurwa gukora amatsinda agizwe n'abantu babiri.
2. Nyuma yo gusubiza ibibazo byabajijwe, abagize buri tsinda bagaragaza ibisubizo byatanzwe hanyuma abahugurwa bose bagatanga ibitekerezo cyangwa se bakabaza ibibazo

Ibibazo:

1. *Ni ibihe bikorwa bibujijwe n'amategeko byabaye? Byakozwe na nde? Byakorewe nde? (Shakira muri **Birabujijwe**)*

2. *Iyo Mutoni yemerera BIHEHE ko bakora imibonano mpuzabitsina byari guhindura iki?*

3. *Ni ubuhe bufasha bwahabwa Mutoni?*

3. *Ni izihe nshingano BIHEHE afite? Azifite mu ruhe rwego ? iyo atazubahirije bigenda gute ?*

4. *Gusambanya umwana bihanishwa ikihe gihano?*

INCAMAKE

Uhugura agomba kubwira abahugurwa mu ncamake ibikubiye mu ngingo ya 133 y' Itegeko N°68/2018 ryo ku wa 30/08/2018 riteganywa ibyaha n'ibihano muri rusange.

Umuntu wese ukorera ku mwana kimwe mu bikorwa bishingiye ku gitsina bikurikira, aba akoze icyaha:

1° gushyira igitsina mu gitsina, mu kibuno cyangwa mu kanwa k'umwana;

2° gushyira urungu urwo arirwo rwose rw'umubiri w'umuntu mu gitsina, cyangwa mu kibuno cy'umwana;

3° gukora ikindi gikorwa cyose ku mubiri w'umwana hagamijwe ishimishamubiri.

Iyo abihamijwe n'urukiko, ahanishwa igifungo kitari munsi y'imyaka makumyabiri (20) ariko kitarenze imyaka makumyabiri n'itanu (25). Iyo gusambanya umwana byakorewe ku mwana uri munsi y'imyaka cumi n'ine (14), igihano kiba igifungo cya burundu kidashobora kugabanywa kubera impamvu nyoroshyacyaha. Iyo gusambanya umwana ufite cyangwa urengeje imyaka cumi n'ine (14) byamuteye indwara idakira cyangwa ubumuga, igihano kiba igifungo cya burundu. Iyo gusambanya umwana byakurikiwe no kubana nk'umugabo n'umugore, igihano kiba igifungo cya burundu kidashobora kugabanywa kubera impamvu nyoroshyacyaha.

Iyo icyaha cyo gusambanya umwana cyakozwe hagati y'abana bafite nibura imyaka cumi n'ine (14) nta kiboko cyangwa ibikangisho byakoreshejwe, nta gihano gitangwa. icyakora, iyo umwana ufite imyaka cumi n'ine (14) ariko utarageza ku myaka cumi n'umunani (18) asambanyije umwana uri munsi y'imyaka cumi n'ine (14), ahanwa hakurikijwe ibiteganywa mu ngingo ya 54 y'iri tegeko.

Isomo rya 3: Gufata ku ngufu uwo bashakanye (Iminota 60)

INKURU YA 7: Ijoro ribara uwariraye



Mukankusi abana n'umugabo we Mbaraga, bamaranye imyaka umunani (8) ndetse bafitanye abana batandatu (6). Mukankusi yasabye umugabo we ko bakwitabira gahunda yo kuboneza urubyaro kuko abyara abazwe kandi ntibagire ubushobozi buhagije bwo kurera abana bafite. Mbaraga yararakaye cyane ndetse asaba umugore we kutazongera kumubwira amafuti nkayo.

Umunsi umwe, Mbaraga yasabye Mukankusi ko bakora imibonano mpuzabitsina ariko umugore arabyanga kuko yumvaga atameze neza ndetse avuga ko ari mu minsi ye y'uburumbuke. Mbaraga yararakaye cyane maze afata umugore we ku ngufu kandi amubwira ko niyongera kumuhakanira azamwirukana mu rugo rwe.

Ibiganiro mu matsinda, iminota 60

Uyoboye ibiganiro asaba abahugurwa gukora amatsinda y'abantu babiri babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

1. *Ese hari ibikorwa bibujijwe n'amategeko byabaye? Niba bihari, bivuge.*


2. *Ni ubuhe bufasha bwahabwa Mukankusi? Yabuhabwa na nde?*

3. *N'izihe nshingano mbaraga afite? Azifite mu ruhe rwego? Iyo atazubahirije bigenda gute?*

4. *N'iyihe mpamvu yemewe ishobora gutuma umugabo afata ku ngufu uwo bashakanye?*

Isomo rya 4: Gukubita uwo bashakanye

INKURU YA 8: Ingare y'umugore igirwa n'ingogo y'umuhoro



Simbikangwa abana n'umugore we witwa Nyiranduhungirehe. Nyuma y'umwaka umwe bashakanye, Simbikangwa yadukanye ingeso yo gukubita umugore kubera impamvu zitandukanye. Bukeye Nyiranduhungirehe yabonye ibaruwa imumenyesha ko ababyeyi be barwaye cyane. Nuko abimenyesha umugabo we ariko Simbikangwa amwima uruhushya rwo kujya kurwaza ababyeyi be. Bukeye Nyirangirente afata umwanzuro wo kujya iwabo atabimenyesheje umugabo.

Simbikangwa atashye yasanze mu rugo ibaruwa Nyirangirente yasize amwandikiye amumenyesha ko agiye kureba uko iwabo byifashe. Nyuma y'iminsi ibiri Nyiranduhungirehe yaje gutaha maze akigera mu rugo asanga Simbikangwa yarakaye cyane. Simbikangwa yahise amwadukira atangira kumukubita, amukomeretsa mu maso ndetse amuvuna akaboko. Nyiranduhungirehe yaratatse cyane ariko habura umutabara kuko abaturanyi bose batinyaga Simbikangwa.

IBIGANIRO MU MATSINDA

Uyoboye ibiganiro asaba abahugurwa gukora amatsinda y'abantu babiri babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

1. *Ese hari ibikorwa bibujijwe n'amategeko byabaye? Niba bihari, bivuge.*

2. *Ni ubuhe bufasha Nyiranduhungire akeneye? Yabuhabwa na nde?*

3. *N'izihe nshingano Simbikangwa afite? Azifite mu ruhe rwego? Iyo atazubahirije bigenda gute?*

Isomo rya 5: Gushyingira ku gahato

INKURU YA 9: Guterura Mwiza, iminota 40



Mwiza n' umwana w'umukobwa ufite imyaka 20, witegura gukora ikizamini cya leta gisoza amashuri yisumbuye. Mwiza abana n'ababyeyi be bombi ndetse n'abavandimwe be batatu.

Umusore witwa Bisamaza yabengutswe Mwiza ndetse amusaba ko bagirana umubano w'urukundo kandi amubwira ko yifuza ko azamubera umufasha. Mwiza yamusubije ko bidashoboka kuko umutima we yaweguriye Muhire, umusore baturanye ndetse bakundana cyane. Bisamaza yakomeje gutitiriza ariko Mwiza aramuhakanira.

Umunsi umwe Bisamaza yacuze umugambi wo gutwara Mwiza ku ngufu abifashijwemo n'abandi basore bagenzi be bane. Nyuma yo kunoza umugambi neza, Bisamaza na bagenzi bahengereye Mwiza avuye kuvoma baramuterura bamujyana mu rugo rwa Bisamaza maze bamukingirana mu cyumba. Nyuma yo guhangana gukomeye no gutabaza hakabura utabara, Bisamaza yarushije Mwiza imbaraga maze amufata ku ngufu. Nyuma y'iminsi itatu Bisamaza yohereje intumwa iwabo wa Mwiza kubamenyesha ko ari we umufite ndetse ko yiteguye gutanga inkwano nyinshi n'icyiru.

IBIGANIRO MU MATSINDA : (iminota 60)

Uyoboye ibiganiro asaba abahugurwa gukora amatsinda y'abantu babiri, maze buri tsinda rigasubiza ibibazo biri hepfo. Nyuma yo kuganira hagati y'abantu babiri, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

1. *Ese hari ibikorwa bibujijwe n'amategeko byakorewe Mwiza? Niba bihari bivuge.*

2. *Ni ubuhe bufasha bwahabwa Mwiza? Yabuhabwa nande?*

3. *N'izihe nshingano bisamaza afite? Azifite mu ruhe rwego? Iyo atazubahirije bigenda gute?*

4. *N'izihe nshingano bagenzi ba Bisamaza bafite? Bazifite mu ruhe rwego? Iyo batazubahirije bigenda gute?*

INCAMAKE KU GICE CYA GATANDATU

Ese mu nkuru zavuzwe haruguru, hari isa n'iyi waba uzi yabayeho?



1. Vuga zimwe mu nkuru zavuzwe haruguru zakubayeho cyangwa zabaye ku wundi muntu uzi.

2. Wumvaga umerewe ute muri icyo gihe? Ni ubuhe bufasha wabonye? Wabuhawe na nde?

3. Niba atari wowe, uwo muntu yari amerewe ate? Ni ubuhe bufasha yabonye? Yabuhawe nande?

UMWANZURO

Uhugura yibutsa abo ahugura ko ibyaha n'ibihano bijyanye n'ihohoterwa rishingiye ku gitsina biteganywa n'itegeko n°68/2018 ryo ku wa 30/08/2018 riteganywa ibyaha n'ibihano muri rusange. Akongera akabibutsa ibibujijwe biri muri iyi mborerahamwe yo hasi.

<p>Birabujijwe</p> 	<ul style="list-style-type: none">• Kubuza umudendezo uwo mwashyingiranywe kubera impamvu z'inkwano, iz'urubyaro cyangwa iz'imiterere kamere• Guterura umugore• Gufata ku ngufu uwo mwashyingiranywe• Kuvangura abana hashingiwe ku gitsina• Gufata ku ngufu undi muntu wese• Gusambanya umwana uri muni y'imyaka 18;• Guca inyuma uwo mwashyingiranywe. Ubikoze aba akoze icyaha cy'ubusambanyi• Gukubita uwo mwashyingiranywe• Gukora ivangura rishingiye ku gitsina• Kugira inshoreke no guharika uwo mwashyingiranywe• Umukoresha guhoza ku nkeke umukozi agamije imibonano mpuzabitsina• Kuvangura mu gihe cyo gutanga akazi hashingiwe ku gitsina
---	--

IGICE CYA KALINDWI:

INZIRA Z'UBUTABERA N'UBUNDI BUFASHA KUWAHOHOTWE

IBIRIMO

Iki gice gikubiyemo inyigisho zifasha uhugurwa kumva neza inzira zihuse uwahohotewe acamo kugirango abone ubufasha burimo ubuvuzi, ubujyanama ndetse n'ubutabera.


Intego:

Nyuma y'iki kiganiro abahugurwa bazaba bafite ubushobozi n'ubumenyi bukurikira:

1. Gusobanukirwa neza ubufasha bwose buhabwa uwahohotewe n'aho butangirwa;
2. Gusobanukirwa ubufasha buhabwa abatanga amakuru ku ihohoterwa rishingiye ku gitsina hakoreshejwe imirongo itishyurwa;

Isomo rya 1: Inzira z'ubutabera

(Iminota 60)



1. Uyoboye ibiganiro asaba abahugurwa gukora amatsinda ane (4)
2. Uyoboye ibiganiro asaba abagize buri tsinda kuganira kuri imwe mu nkuru zikurikira:

1. **Itsinda 1:** Inkwano za Mugabo
2. **Itsinda 2:** Irage ryo kwa Nkubito
3. **Itsinda 3:** Ingare y'umugore igirwa n'ingogo y'umuhoro
4. **Itsinda 4:** Guterura Mwiza

3. Abagize buri tsinda basubiza ibibazo bikurikira:
 1. *Vuga ubwoko bw'ihohoterwa uwahohotewe yakorewe.*
 2. *Sobanura inzira uwahohotewe acamo ushingiyeye ku nzira zigaragara ku gishushanyo kiri haruguru.*
 3. *Sobanura impamvu wahisemo iyo nzira.*
 4. *Ese hari izindi nzira zitari mu gishushanyo uwahohotewe yabonamo ubufasha? Zivuge.*

Nyuma y'ibiganiro ubiyoboye asobanurira abahugurwa ko inzira uwakorewe ihohoterwa rishingiyeye ku gitsina acamo, iterwa n'ubwoko bw'ihohoterwa yakorewe (Reba amoko y'ihohoterwa).

ICYITONDERWA

Igihe habaye gufatwa ku ngufu, gusambanywa cyangwa gukubitwa, uwahohotewe yirinda guhita yiyuhagira ahubwo agomba kwihutira kugera kuri Isange (Ikorera ku bitaro by'Akarere). Ni mu rwego rwo kubungabunga ibimenyetso;

Ushobora kandi kumenyesha ikibazo cyawe inshuti z'umuryango zikorera ku rwego rw'umudugudu abajyanama b'ubuzima bakagufasha kugeza ikibazo cyawe ku nzego zibishinzwe. Ushobora no guhamagara numero ya RIB itishyurwa 3512 ndetse na116.

Isomo rya 2: Imirongo ya telefone itishyurwa (Iminota 60)



Ushobora gutabaza cyangwa gutabariza uwakorewe ihohoterwa rishingiyeye ku gitsina ukoresheje imirongo ya telefone itishyurwa ikurikira:



Ibiganiro mu matsinda

Uyoboye ibiganiro asaba abahugurwa gukora amatsinda atanu (5), maze buri tsinda rigasubiza ibibazo biri hepfo. Nyuma yo kuganira muri buri tsinda, uyoboye ibiganiro asaba buri tsinda kugaragaza ibisubizo byatanzwe ndetse agasaba abahugurwa bose gutanga ibitekerezo.

Saba buri tsinda guhamagara umwe mu mirongo itishyurwa yavuzwe haruguru (**Banza wivuge amazina hanyuma usobanurire ukwakiriye kuri telefone ko muri mu mahugurwa kandi mwifuza kumenya ubufasha buhabwa abakorewe ihohoterwa rishingiye ku gitsina bahamagara kuri uwo murongo**)

Ushobora kubaza ibibazo bikurikira:

4. Ni ubuhe bufasha buhabwa abakorewe ihohoterwa rishingiye ku gitsina cyangwa abifuza gutanga amakuru bahamagara kuri uyu murongo?
5. N'ibindi bibazo by'amatsiko.

Uyoboye ibiganiro asobanurira abahugurwa ko guhamagara ku mirongo itishyurwa bidakuraho inzira uwahohotewe aboneramo ubufasha. Ahubwo imirongo itishyurwa itanga amakuru afasha kumenya ubufasha bukenewe n'aho butangirwa. Umugereka ukurikira ukubiyemo ingingo z'ingenzi z'amategeko akumira kandi ahana ihohoterwa rishingiye ku gitsina.

UMUGEREKA W'AMATEGEKO N'INGINGO Z'INGENZI BYAKORESHEJWE

ITEGEKO	INGINGO Z'INGENZI
<p>Itegeko nshinga rya Repubulika y'u Rwanda ryavuguruwe mu 2015</p>	<p>Ingingo ya 10: Uburinganire bw'abanyarwanda bose n'ubw'abagabo n'abagore ni rimwe mu mahame remezo agenderwaho mu Rwanda.</p> <p>Ingingo ya 13: Umuntu ni umunyagitinyiro kandi ni indahungabanywa. Leta ifite inshingano zo kumwubaha, kumurinda no kumurengera</p> <p>Ingingo ya 16: Ivangura rishingiye kugitsina rirabujijwe kandi rihanwa n'amategeko.</p> <p>Ingingo ya 17: Abashyingiranywe bafite uburenganzira n'inshingano bingana mu gihe cyo gushyingiranywa, igihe babana n'igihe cyo gutandukana.</p>
<p>Itegeko no 59/2008 ryo kuwa 10/09/2008 rikumira kandi rihana ihohoterwa iryo ariryo ryose rishingiye ku gitsina</p>	<p>Ingingo ya 4: kubuza umudendezo umwe mu bashyingiranywe kubera impamvu z'inkwano, iz'urubyaro n'iz'imiterere kamere.</p> <p>Ingingo ya 6: Ihohoterwa rishingiye ku gitsina ni imwe mu mpamvu ituma uwahohotewe asaba ubutane.</p> <p>Ingingo ya 7: Birabujijwe kutita ku mwana ushinzwe kurera, kumukoresha icyamutesha agaciro cyangwa kumuhoza ku nkeke hashingiwe ku gitsina.</p> <p>Ingingo ya 8: Umugore wabyaye ahabwa ikiruhuko cy'ububyeyi kingana n'amezi atatu (3) n'isaha yo konsa buri muni w'akazi yumvikanye n'umukoresha we, mu gihe kingana n'amezi cumi n'abiri (12) uhereye igihe ikiruhuko cy'ububyeyi kirangiriye;</p> <p>Ingingo ya 9: Birabujijwe kwirukana ku kazi umugore kubera ko atwite cyangwa ari mu kiruhuko cy'ububyeyi. Gutwita no kubyara ku munyeshuri ntibigomba kuba impamvu yo kuvutswa uburenganzira bwe mu myigire;</p> <p>Ingingo ya 10: Buri muntu wese agomba kurinda ihohoterwa rishingiye ku gitsina, gutabara no gutabariza uwarikorewe;</p> <p>Ingingo ya 12: Mu gihe bitabangamiye urega, urubanza ku cyaha cy'ihohoterwa rishingiye ku gitsina ruburanishirizwa kandi rugasomerwa aho icyaha cyakorewe mu gihe bishoboka;</p> <p>Ingingo ya 14: Umuntu wese uhamwe n'icyaha cy'ubusambanyi ahanishwa igifungo kuva ku mezi atandatu (6) kugeza ku myaka ibiri (2). Ibihano biteganyijwe mu gika kibanziriza iki ni byo bihanishwa uwo basambanye;</p> <p>Ingingo ya 16: Umuntu wese uhamwe n'icyaha cyo gufata undi ku ngufu ahanishwa igifungo kuva ku myaka icumi (10) kugeza ku myaka cumi n'itanu (15). Iyo uwafashwe ku ngufu byamuteye indwara, yaba iyo ku mubiri cyangwa iyo mu mutwe, uwakoze icyo cyaha ahanishwa igifungo kuva ku myaka cumi n'itanu (15) kugeza ku myaka makumyabiri (20) kandi agatanga n'amafaranga yo kuvuza uwo yafashe ku ngufu. Iyo iyo ndwara</p>

idashobora gukira cyangwa bimuviriyemo urupfu, uwakoze icyo cyaha ahanishwa gufungwa burundu;

Ingingo ya 17: Guterura bihanishwa igifungo kuva ku myaka itanu (5) kugeza ku myaka umunani (8) n'ihazabu y'amafaranga kuva ku bihumbi ijana (100.000 Frw) kugeza ku bihumbi magana abiri (200.000 Frw);

Ingingo ya 18: Umuntu wese utita ku mwana yabyaye kubera ko ari umuhungu cyangwa umukobwa, akamutoteza cyangwa agatoteza uwo bamubyaranye, ahanishwa igifungo kuva kumezi atandatu (6) kugeza ku myaka itatu (3);

Ingingo ya 19: Ukoresheje imibonano mpuzabitsina ku gahato uwo bashyingiranywe ahanishwa igifungo kuva ku mezi atandatu (6) kugeza ku myaka ibiri (2);

Ingingo ya 20: Ahanishwa igifungo kuva ku mezi atandatu (6) kugeza ku myaka ibiri (2), umuntu wese ugaragaweho igikorwa cyo guhoza ku nkeke uwo bashyingiranywe;

Ingingo ya 21: Ahanishwa igifungo kuva ku myaka ibiri (2) kugeza ku myaka ine (4) n'ihazabu y'amafaranga kuva ku bihumbi ijana (100.000 Frw) kugeza ku bihumbi magana abiri (200.000 Frw) umuntu wese ugaragaweho igikorwa cy'ubushoreke. Ahanishwa ibihano bivugwa mu gika cya mbere cy'iyi ngingo umuntu wese wemeye kuba inshoreke;

Ingingo ya 22: Ahanishwa igifungo cy'imyaka itatu (3) kugeza ku myaka itanu (5) n'ihazabu y'amafaranga kuva ku bihumbi magana atatu (300.000 Frw) kugeza ku bihumbi magana atanu (500.000 Frw), umuntu wese washyingiranwe n'undi amasezerano y'ubushyingiranywe ya mbere agifite agaciro;

Ingingo ya 23: Ahanishwa igifungo kuva ku myaka icumi (10) kugeza ku myaka cumi n'itanu (15) n'ihazabu y'amafaranga kuva ku bihumbi magana atanu (500.000 frw) kugeza kuri miliyoni imwe (1.000.000 frw), umuntu wese uhamwe n'icyaha cyo kwigarurira umuntu hagamijwe kwishimisha bishingiye ku gitsina;

Ingingo ya 24: Ahanishwa igifungo kuva ku myaka ibiri (2) kugeza ku myaka itanu (5) n'ihazabu y'amafaranga kuva ku bihumbi ijana (100.000 Frw) kugeza ku bihumbi magana abiri (200.000 Frw), umukoresha cyangwa undi wese witwaza imirimo ashinzwe agahozza uwo akuriye mu kazi ku nkeke akoresheje amabwiriza, ibikangisho n'iterabwoba agamije kwishimisha bishingiye ku gitsina.(Ingingo ya 24);

Ingingo ya 27: Uwakoze ihohoterwa, yangiza cyangwa agamije kwangiza imyanya ndangagitsina ahanishwa igifungo cya burundu;

Ingingo ya 29: Umuntu wese ukoresheje undi imibonano mpuzabitsina agambiriye kumwanduza indwara idakira

	<p>ahanishwa igifungo cya burundu; Ingingo ya 30: Umuntu wese ukoresheje imiti, ibiyobyabwenge, amashusho, ibimenyetso imvugo cyangwa inyandiko, agamije ko hakorwa ihohoterwa rishingiye ku gitsina, ahanishwa igifungo kuva ku myaka itanu (5) kugeza ku myaka umunani (8) n'ihazabu y'amafaranga kuva ku bihumbi ijana (100.000 Frw) kugeza ku bihumbi magana abiri (200.000 Frw); Ingingo ya 32: Ahanishwa igifungo kuva ku myaka icumi (10) kugeza ku myaka cumi n'itanu (15) n'ihazabu y'amafaranga kuva ku bihumbi magana atanu (500.000 Frw) kugeza kuri miliyoni imwe (1.000.000 Frw), umuntu wese ukoreye ihohoterwa rishingiye ku gitsina ugeze mu zabukuru. (Ingingo ya 32); Ingingo ya 33: Ahanishwa igifungo kuva ku myaka icumi (10) kugeza ku myaka cumi n'itanu (15) n'ihazabu y'amafaranga kuva ku bihumbi magana atanu (500.000 Frw) kugeza kuri miliyoni imwe (1.000.000 Frw), umuntu wese ukoze ihohoterwa rishingiye ku gitsina ku muntu ufite ubumuga. (Ingingo ya 33); Ingingo ya 33: Umuntu wese wanze gutabara cyangwa gutabariza uwakorewe ihohoterwa rishingiye ku gitsina, uwanze gutanga ubuhama ku ihohoterwa ryamukorewe cyangwa ryakorewe undi, ahanishwa igifungo kuva ku mezi atandatu (6) kugeza ku myaka ibiri (2) n'ihazabu y'amafaranga kuva ku bihumbi mirongo itanu (50.000 frw) kugeza ku bihumbi magana abiri (200.000 frw), cyangwa kimwe muri ibyo bihano.</p>
<p>Itegeko N°68/2018 ryo ku wa 30/08/2018 riteganya n'ibihano rusange ibyaha muri</p>	<p>Ingingo ya 134: Umuntu wese uhamijwe n'urukiko gukoresha imibonano mpuzabitsina ku gahato, ahanishwa igifungo kitari muni y'imyaka icumi (10) ariko kitarenze imyaka cumi n'itanu (15) n'ihazabu y'amafaranga y'u Rwanda atari muni ya miliyoni imwe; Ingingo ya 114: Umuntu wese wangiza imyanya ndangagitsina y'undi muntu aba akoze icyaha. Iyo abihamijwe n'urukiko, ahanishwa igifungo cya burundu; Ingingo ya 133: Umuntu wese ukorera ku mwana kimwe mu bikorwa bishingiye ku gitsina bikurikira, aba akoze icyaha: 1° gushyira igitsina mu gitsina, mu kibuno cyangwa mu kanwa k'umwana; 2° gushyira urugingo urwo arirwo rwose rw'umubiri w'umuntu mu gitsina, cyangwa mu kibuno cy'umwana; 3° gukora ikindi gikorwa cyose ku mubiri w'umwana hagamijwe ishimishamubiri Ingingo ya 136: Umuntu wese washyingiwe ukorana imibonano mpuzabitsina n'uwo batashyiranywe, aba akoze icyaha.</p>

	<p>Iyo abihamijwe n'urukiko ahanishwa igifungo kitari muni y'amezi atandatu (6) ariko kitarenze umwaka umwe (1).</p> <p>Ingingo ya 137: Umuntu ukorera uwo bashyingiranywe igikorwa cy'ihohoterwa kibabaza umubiri kandi gishingiye ku gitsina, aba akoze icyaha. Iyo abihamijwe n'urukiko, ahanishwa igifungo kitari muni y'imyaka itatu (3) ariko kitarenze imyaka itanu (5) ;</p> <p>Ingingo ya 138: Umuntu ubana nk'umugabo n'umugore n'uwo batashyingiranywe umwe muri bo cyangwa bombi bafite uwo bashyingiranywe, aba akoze icyaha. Iyo abihamijwe n'urukiko, ahanishwa igifungo kirenze umwaka umwe (1) ariko kitarenze imyaka ibiri (2);</p> <p>Ingingo ya 139: Umwe mu bashyingiranywe uta urugo rwe mu gihe kirenze amezi abiri (2) nta mpamvu zikomeye akihunza ibyo ategetswe, aba akoze icyaha. Iyo abihamijwe n'urukiko, ahanishwa igifungo kitari muni y'amezi atatu (3) ariko kitarenze amezi atandatu (6);</p> <p>Ingingo ya 142: Umuntu wese, mu buryo ubwo ari bwo bwose, utuma undi akora igikorwa gishingiye ku gitsina ku nyamaswa, ahanishwa igihano cy'igifungo kitari muni y'imyaka irindwi (7) ariko kitarenze.</p>
<p>Itegeko no 32/2016 ryo kuwa 28/08/2016 rigenga abantu n'umuryango</p>	<p>Ingingo ya 206: Abashyingiranywe bafite uburenganzira n'inshingano bingana. Abashyingiranywe bagomba kudahemukirana, gutabarana no gufashanya.</p> <p>Ingingo ya 209: Abashyingiranywe bafatanyabw'urugo rwabo harimo kurwitaho kugira ngo rugwize umuco mwiza n'ibirutunga no kurwubaka rugakomera.</p> <p>Ingingo ya 218: Ihohoterwa rishingiye ku gitsina ni impamvu yemewe n'amategeko yo gusaba ubutane</p>
<p>Itegeko no 27/2016 ryo kuwa 08/07/2016 rigenga imicungire y'umutungo w'abashakanye, impano n'izungura.</p>	<p>Ingingo ya 54: Abana amategeko mbonezamubano yemera ko ari ab'uwapfuye bazungura ku buryo bungana nta vangura hagati y'umwana w'umuhungu n'uw'umukobwa.</p> <p>Ingingo ya 55: Guhera ku muni izungura ryatangiriyeho, umuzungura, yaba uzungura ku bw'irage cyangwa ku bw'itegeko yitwa umuzungura iyo abyemeye.</p> <p>Ingingo ya 76: Abashyingiranywe bafitanye amasezerano y'ivangamutungo rusange bazungurwa mu buryo bukurikira: 1° iyo umwe apfuye usigaye yegukana umutungo wose akubahiriza inshingano yo kurera abana babo n'ab'uwapfuye bemewe n'amategeko; 2° iyo bombi bapfuye basize abana, umutungo wose uzungurwa n'abana bose abapfuye basize. Iyo hari abana badahuriyeho, umutungo ugabanywamo kabiri (2), buri mwana akazungura</p>

umubyeyi we;

3° iyo bombi bapfuye badasize abana, umutungo ugabanywamo kabiri, kimwe cya kabiri (1/2) kigahabwa abazungura b'umugabo ikindi kigahabwa abazungura b'umugore;

4° iyo uwapfakaye nta mwana afitanye n'uwapfuye akongera gushaka afata kimwe cya kabiri (1/2) cy'umutungo nk'uburenganzira akura ku masezerano y'ivangamutungo, kimwe cya (1/2) gisigaye akakizungurana n'abazungura bandi b'uwapfuye. Muri icyo gihe agumana bitatu bya kane (3/4) by'umutungo w'uwapfuye. Iyo atongeye gushyingirwa yegukana umutungo wose akawurereramo abana uwapfuye yemeye cyangwa yemejwe n'amategeko, iyo bahari;

5° iyo uwapfakaye yongeye gushyingirwa kandi nyamara yari afitanye abana n'uwapfuye cyangwa hari abo yari yaremeye cyangwa yaremejwe ku buryo bwemewe n'amategeko, izungura ry'uwapfuye rirafungurwa, maze kimwe cya kabiri (1/2) kikegukanwa n'uwapfakaye nk'uburenganzira akura ku masezerano y'icungamutungo, ikindi akakizungurana n'abana bose uwapfuye asize ku buryo bungana. Muri icyo gihe, uruhare rw'abana batarageza ku myaka y'ubukure arakomeza akarubacungira, keretse urukiko rubigennye ukundi.

6° iyo uwapfakaye ataye inshingano zo kurera abana bose cyangwa bamwe muri bo uwapfuye asize, yamburwa n'urukiko rubifitiye ububasha izo nshingano na kimwe cya kabiri (1/2) cy'umutungo wose, rukanagena ushinzwe kubarera no kubacungira umutungo kugeza igihe bagiriye imyaka y'ubukure.

Ingingo ya 77: Ku bashyingiranywe bafitanye amasezerano yo kuvanga umutungo w'umuhahano, izungura rikurikiza uburyo bukoreshwa mu ivangamutungo rusange ku mutungo w'umuhahano n'uburyo bukoreshwa ku ivanguramutungo risesuye ku mutungo wa buri wese hakurikijwe ibiteganywa n'iri tegeko

Haseguriwe ibivugwa mu ngingo ya 75 y'iri tegeko, ku bashyingiranywe bafitanye amasezerano y'ivanguramutungo risesuye, iyo umwe apfuye, usigaye agumana umutungo we bwite naho umutungo w'uwapfuye ukazungurwa n'abana bose bemewe n'amategeko uwapfuye asize.

Ingingo ya 78: Iyo harimo abana bataragera ku myaka y'ubukure, uwapfakaye akomeza kubacungira umutungo bazunguye.

Iyo uwapfuye nta bana asize, uwo bashyingiranywe usigaye azungurana n'abandi bazungura umutungo uwapfuye asize, akegukana kimwe cya kabiri (1/2) cyawo, ikindi kikegukanwa n'abandi bazungura b'uwapfuye. Iyo habaye igabana, uwapfakaye ashobora gusaba ko yahabwa mu mugabane we mbere y'abandi bazungura bose, inzu yabanagamo n'uwo bari

	<p>barashyingiranywe n'ibiyirimo. Iyo agaciro kayo n'ak'ibiyirimo karenze umugabane we, arayigumana ariko agatanga inshumbushanyo.</p> <p>Muri iyi ngingo inzu y'umuryango ni inzu bwite abashyingiranywe babanagamo nk'umugabo n'umugore ibarirwa mu mutungo w'umwe muri bo.</p> <p>Ingingo ya 79: Iyo uwapfuye asize abana batarageza ku myaka y'ubukure, uwapfakaye asigara acunga umutungo wose uwapfuye asize kugeza igihe abana bose bemewe n'amategeko yasize bageze ku myaka y'ubukure, bakazungura umutungo w'umubyeyi wabo wapfuye.</p> <p>Iyo atubahirije izo nshingano yamburwa n'urukiko rubifitiye ububasha uburenganzira bwo kubacungira umutungo wose uwapfuye asize, rukagena ushinzwe kubarera no kubacungira umutungo kugeza igihe bagiriye imyaka y'ubukure.</p> <p>Uwapfakaye akomeza kuba mu nzu y'umuryango yabanagamo n'uwo bari bashyingiranywe n'ibiyirimo igihe cyose agifite abana babo arera bemewe n'amategeko uwapfuye asize. Ubwo burenganzira arabugumana kugeza igihe yongeye gushyingirwa cyangwa abana bageze ku myaka y'ubukure bakazungura umutungo w'umubyeyi wabo wapfuye.</p>
<p>Itegeko no 71/2018 ryo kuwa 31/08/2018 ryerekeye kurengera umwana</p>	<p>Ingingo ya 3: 3° ihohoterwa rikorewe mu rugo: ibihano byo ku mubiri, by'ubunyamaswa cyangwa bitesha agaciro, ibikorwa by'ihohotera rishingiye ku gitsina, ivangura, iyicarubozo, guhutazwa ku mubiri cyangwa mu mitekerereze, kutitabwaho, gushakira inyungu ku mwana cyangwa kumutererana bikozwe n'umubyeyi cyangwa ababyeyi, uwishingiye umwana cyangwa undi muntu uwo ari we wese umufiteho ububasha ahabwa n'amategeko;</p> <p>6° umwana: umuntu wese utarageza ku myaka cumi n'umunani (18) y'amavuko.</p> <p>Ingingo ya 5: Abana bose barengerwa kimwe nta vangura iryo ari ryo ryose. icyakora, ibyemezo n'ingamba byihariye bifatiwe abana bafite ibibazo byihariye ntibifatwa nk'ivangura.</p>
<p>Itegeko n° 66/2018 ryo kuwa 30/08/2018 rigenga umurimo mu Rwanda</p>	<p>Ingingo ya 9: Kurindwa ivangura mu kazi. Umukoresha agomba guha abakozi amahirwe angana mu kazi.</p> <p>Ingingo ya 8: Guhoza ku nkeke uwo ukuriye mu kazi hagamijwe imibonano mpuzabitsina ku buryo ubwo ari bwo bwose birabujijwe.</p>
<p>Iteka rya Minisitiri n°03 ryo kuwa 13/07/2010 rigena ibiruhuko by'ingoboka</p>	<p>Ingingo ya 9: Umukoresha agomba guha abakozi amahirwe angana mu kazi. Umukoresha abujijwe gukora ivangura mu kazi rishingiye ku gitsina no ku rindi vangura iryo ari ryo ryose.</p>

<p>Itegeko n° 43/2013 ryo kuwa 16/06/2013 rigenga ubutaka mu Rwanda</p>	<p>Umukoresha wese agomba guhamba umushahara ungana abakozi bakora imirimo y'agaciro kangana nta vangura iryo ari ryo ryose.</p> <p>Ingingo ya 56: Umukozi w'igitsina gore wabyaye afite uburenganzira ku kiruhuko cyo kubyara kingana nibura n'ibyumweru cumi na bibiri (12) bikurikirana. Igihe cy'ikiruhuko cyo kubyara kivugwa mu gika cya mbere cy'iyi ngingo gikubiyemo ibyumweru nibura bibiri (2) umukozi w'igitsina gore ashobora gufata mbere yo kubyara.</p> <p>Ingingo ya 2: umukozi ahabwa ikiruhuko cy'ingoboka iminsi (4) y'imibyizi iyo umugore we yabyaye kandi agakomeza guhembwa umushahara we</p> <p>Ingingo ya 4: Ivangura iryo ari ryo ryose irishingiye ku gitsina ku byerekeranye no kubona ubutaka no kugira uburenganzira bwo kubutunga rirabujijwe.</p> <p>Uburenganzira ku butaka hagati y'umugabo n'umugore bashyingiranywe ku buryo bwemewe n'amategeko buterwa n'icungamutungo bahisemo.</p>
---	---

Address: KG 11AV95
KIGALI - RWANDA
P.O.BOX3030 Kigali
Phone : +250 788 30 08 34
e-mail : info@haguruka.org.rw